

无 量 义 经
佛说观普贤菩萨行法经

合刊

弘一佛堂 敬印

无量义经

佛说观普贤菩萨行法经

合刊

弘一佛堂 敬印

新平堂
PDG

香 赞

炉香乍爇。法界蒙熏。诸佛海会悉遥闻。随处结祥云。

诚意方殷。诸佛现全身。南无香云盖菩萨摩訶萨。三称

南无本师释迦牟尼佛 三称

《无量义经》生字表

bá	jì	bó	hé
颯	罽	怕	阒
yì	huái	shùn	xū
劓	踝	眴	歔

《佛说观普贤菩萨行法经》生字表

fú	niè	yì	gǔ	wǎng	
鳧	蹶	泐	毂	辘	
chù	gòu	lí	zhōng	bié	chì
阒	遘	羸	豕	筓	敕

无量义经

萧齐天竺沙门昙摩伽陀耶舍译

德行品第一

如是我闻。一时佛住王舍城耆闍崛山中。与大比丘众万
二千人俱。菩萨摩訶萨八万人。天。龙。夜叉。乾闥婆。
阿修罗。迦楼罗。紧那罗。摩侯罗伽。诸比丘。比丘尼。
及优婆塞。优婆夷俱。大转轮王。小转轮王。金轮银轮。
诸轮之王。国王王子。国臣国民。国士国女。国大长者。
各与眷属。百千万数。而自围绕。来诣佛所。头面礼足。
绕百千匝。烧香散华。种种供养。供养佛已。退一面坐。
其菩萨名曰。文殊师利法王子。大威德藏法王子。无忧

藏法王子。大辩藏法王子。弥勒菩萨。导首菩萨。药王
菩萨。药上菩萨。华幢菩萨。华光菩萨。陀罗尼自在王
菩萨。观世音菩萨。大势至菩萨。常精进菩萨。宝印手
菩萨。宝积菩萨。宝杖菩萨。越三界菩萨。毗摩罗罗菩
萨。香象菩萨。大香象菩萨。狮子吼王菩萨。狮子游戏
世菩萨。狮子奋迅菩萨。狮子精进菩萨。勇锐力菩萨。
狮子威猛伏菩萨。庄严菩萨。大庄严菩萨。如是等菩萨
摩诃萨八万人俱。是诸菩萨。莫不皆是法身大士。戒。
定。慧。解脱。解脱知见。之所成就。其心禅寂常在三
昧。恬安。愔怕。无为。无欲。颠倒。乱想。不复得入。静寂清澄
志玄虚寞。守志不动。亿百千劫。无量法门。悉现在前。得

大智慧通达诸法。晓了分别性相真实。有无长短明现显白。又善能知诸根性欲。以陀罗尼无碍辩才。诸佛转法轮。随顺能转。微滴先堕。以淹欲尘。开涅槃门。扇解脱风。除世恼热。致法清凉。次降甚深十二因缘。用洒无明老病死等。猛盛炽然苦聚日光。尔乃洪注无上大乘。润渍众生诸有善根。布善种子。遍功德田。普令一切发菩提萌。智慧日月。方便时节。扶疏增长大乘事业。令众疾成阿耨多罗三藐三菩提。常住快乐。微妙真实。无量大悲救苦众生。是诸众生真善知识。是诸众生大良福田。是诸众生不请之师。是诸众生安隐乐处。救处护处。大依止处。处处为众作大良医。导师。大导师。能为生

盲而作眼目。聋剽哑者作耳鼻舌。诸根毁缺能令具足。颠狂荒乱作大正念。船师大船师。运载群生度生死河。置涅槃岸。医王大医王。分别病相。晓了药性。随病授药。令众乐服。调御大调御。无诸放逸行。犹如象马师。能调无不调。狮子勇猛。威伏众兽。难可沮坏。游戏菩萨诸波罗蜜。于如来地坚固不动。安住愿力。广净佛国。不久得成阿耨多罗三藐三菩提。是诸菩萨摩訶萨。皆有如斯不思議德。

其比丘名曰。大智舍利弗。神通目犍连。慧命须菩提。摩诃迦旃延。弥多罗尼子。富楼那。阿若憍陈如等。天眼阿那律。持律优波离。侍者阿难。佛子罗云。优波难

陀。离婆多。劫宾那。薄拘罗。阿周陀。莎伽陀。头陀
大迦叶。优楼频螺迦叶。伽耶迦叶。那提迦叶等。如是
比丘万二千人。皆阿罗汉。尽诸结漏。无复缚著。真正
解脱。尔时大庄严菩萨摩诃萨。遍观众座各定意已。与
众中八万菩萨摩诃萨俱。从座而起。来诣佛所。头面礼
足。绕百千匝。烧散天华。天香。天衣。天璎珞。天无
价宝。从上空。旋转来下。四面云集而献于佛。天厨。
天钵器。天百味。充满盈溢。见色闻香。自然饱足。天
幢。天幡。天轩盖。天妙乐具。处处安置。作天妓乐娱
乐于佛。即前胡跪。合掌一心。俱共同声。说偈赞言。
大哉大悟大圣主。无垢无染无所著。天人象马调御师。

道风德香熏一切。智恬情泊虑凝静。意灭识亡心亦寂。

永断梦妄想思念。无复诸大阴界入。其身非有亦非无。

非因非缘非自他。非方非圆非短长。非出非没非生灭。

非造非起非为作。非坐非卧非行住。非动非转非闲静。

非进非退非安危。非是非非非得失。非彼非此非去来。

非青非黄非赤白。非红非紫种种色。戒定慧解知见生。

三明六通道品发。慈悲十力无畏起。众生善业因缘出。

示为丈六紫金辉。方整照耀甚明彻。毫相月旋项日光。

旋发紺青顶肉髻。净眼明镜上下眇。眉睫紺舒方口颊。

唇舌赤好若丹果。白齿四十犹珂雪。额广鼻修面门开。

胸表万字师子臆。手足柔软具千辐。腋掌合纒内外握。

臂修肘长指直纤。皮肤细软毛右旋。踝膝不现阴马藏。
细筋锁骨鹿膂肠。表里映彻净无垢。净水莫染不受尘。
如是等相三十二。八十种好似可见。而实无相非相色。
一切有相眼对绝。无相之相有相身。众生身相相亦然。
能令众生欢喜礼。投心表敬诚殷勤。因是自高我慢除。
成就如是妙色躯。我等八万之等众。俱共稽首咸归命。
善灭思想心意识。象马调御无著圣。稽首归依法色身。
戒定慧解知见聚。稽首归依妙种相。稽首归依难思议。
梵音雷震响八种。微妙清静甚深远。四谛六度十二缘。
随顺众生心业转。有闻莫不心意开。无量生死众结断。
有闻或得须陀洹。斯陀阿那阿罗汉。无漏无为缘觉处。

无生无灭菩萨地。或得无量陀罗尼。无碍乐说大辩才。
演说甚深微妙偈。游戏澡浴法清渠。或跃飞腾现神足。
出没水火身自由。如是法轮相如是。清净无边难思议。
我等咸复共稽首。归依法轮转以时。稽首归依梵音声。
稽首归依缘谛度。世尊往昔无量劫。勤苦修习众德行。
为我人天龙神王。普及一切诸众生。能舍一切诸难舍。
财宝妻子及国城。于法内外无所吝。头目髓脑悉施人。
奉持诸佛清净戒。乃至失命不毁伤。若人刀杖来加害。
恶口骂辱终不瞋。历劫挫身不倦惰。昼夜摄心常在禅。
遍学一切众道法。智慧深入众生根。是故今得自在力。
于法自在为法王。我复咸共礼稽首。归依能勤诸难勤。

说法品第二

尔时大庄严菩萨摩诃萨与八万菩萨摩诃萨。说是偈赞佛已。俱白佛言。世尊。我等八万菩萨之众。今者欲于如来法中。有所谘问。不审世尊垂愍听否。

佛告大庄严菩萨及八万菩萨言。善哉善哉。善男子。善知是时。恣汝所问。如来不久当般涅槃。涅槃之后。普令一切无复余疑。欲何所问。便可说也。

于是大庄严菩萨。与八万菩萨。即共同声。白佛言。世尊。菩萨摩诃萨。欲得疾成阿耨多罗三藐三菩提。应当修行何等法门。何等法门能令菩萨摩诃萨。疾成阿耨多罗三藐三菩提。佛告大庄严菩萨。及八万菩萨言。善男

子。有一法门。能令菩萨疾得阿耨多罗三藐三菩提。若有菩萨。学是法门者。则能疾得阿耨多罗三藐三菩提。世尊。是法门者。号字何等。其义云何。菩萨云何修行。佛言。善男子。是一法门。名为无量义。菩萨欲得修学无量义者。应当观察一切诸法。自本来今。性相空寂。天大无小。无生无灭。非住非动。不进不退。犹如虚空。无有二法。而诸众生虚妄横计。是此是彼。是得是失。起不善念。造众恶业。轮回六趣。备受苦毒。无量亿劫不能自出。菩萨摩訶萨如是谛观。生怜悯心。发大慈悲。将欲救拔。又复深入一切诸法。法相如是生如是法。法相如是住如是法。法相如是异如是法。法相如是灭如是

法。法相如是能生恶法。法相如是能生善法。住异灭者亦复如是。菩萨如是观察四相始末。悉遍知己。次复谛观一切诸法。念念不住。新新生灭。复观即时生住异灭。如是观已。而入众生诸根性欲。性欲无量故。说法无量。说法无量故。义亦无量。无量义者。从一法生。其一法者。即无相也。如是无相。无相不相。不相无相。名为实相。菩萨摩訶萨。安住如是真实相已。所发慈悲。明谛不虚。于众生所。真能拔苦。苦既拔已。复为说法。令诸众生。受于快乐。善男子。菩萨若能如是修一法门无量义者。必得疾成阿耨多罗三藐三菩提。善男子。如是甚深无量大乘无量义经。文理真正。尊无过上。三世

诸佛所共守护。无有众魔群道得入。不为一切邪见生死之所坏败。是故善男子。菩萨摩訶萨。若欲疾成无上菩提。应当修学如是甚深无上大乘无量义经。

尔时大庄严菩萨复白佛言。世尊。世尊说法不可思议。众生根性亦不可思议。法门解脱亦不可思议。我等于佛所说诸法无复疑难。而诸众生生迷惑心。故重谘问。世尊。自从如来得道已来四十余年。常为众生演说诸法四相之义。苦义空义。无常无我。无大无小。无生无灭。一相无相。法性法相。本来空寂。不来不去。不出不没。若有闻者。或得暖法。顶法。忍法。世第一法。须陀洹果。斯陀含果。阿那含果。阿罗汉果。辟支佛道。发菩

提心。登第一地。第二第三至第十地。往日所说诸法之义。与今所说有何等异。而言甚深无上大乘无量义经。菩萨修行必得疾成无上菩提。是事云何。唯愿世尊。慈悲哀一切。广为众生而分别之。普令现在及未来世。有闻法者无余疑网。于是佛告大庄严菩萨。善哉善哉。大善男子。能问如来。如是甚深无上大乘微妙之义。当知汝能多所利益。安乐人天。拔苦众生。真大慈悲。信实不虚。以是因缘。必得疾成无上菩提。亦令一切今世来世。诸有众生。得成无上菩提。善男子。自我道场菩提树下。端坐六年。得成阿耨多罗三藐三菩提。以佛眼观。一切诸法不可宣说。所以者何。诸众生等性欲不同。性欲不